

《佛說無量壽佛名號利益大事因緣經》

曹魏 天竺 三藏 康僧鎧 譯 / 信願法師編校

收錄於《卍字續藏經》第一冊

我聞如是，一時佛在王舍城耆闍崛山中，與大比丘眾，千二百五十人俱。諸漏已盡，神通明達。諸眾聖，其名曰：尊者阿難、尊者目犍連、尊者舍利弗、尊者大牛王、尊者摩訶迦葉、尊者摩訶伽耶迦葉、尊者大周那、尊者名聞迦葉、尊者大淨心志等，皆如斯等，以為上首。

又普賢菩薩、文殊師利菩薩、信淨慧菩薩、善解脫菩薩等諸大正士，滿足無量願行，安住不可思議功德之法，智慧聖明。如是等諸菩薩眾，不可稱計，即時來會。

爾時，世尊告阿難曰：乃往過去久遠無量無央數劫，有一大比丘，名曰法藏，值遇無數百千佛，滿足無量大願，超過諸佛所行之法。

彼法藏比丘，今已成正覺，現在西方清淨安樂剎，號曰：不可思議光無量壽如來。其佛本願力故，以不可思議威神力，遍滿十方世界，以大音聲，宣布名號功德。

是故，十方世界，一切有情，聞信其名號功德，即時入正定位，生清淨安樂佛國。是故，有情之類，縱令在人中，以宿報故，或聾盲喑啞，愚癡狂惡，以其佛光明名號因緣，皆得解脫。或在三途勤苦之中，受苦無間，以其佛光明名號因緣，皆蒙解脫。聞其光明名號，若信受、若稱名，即時除無量無數劫生死之罪。

是故，阿難！稱彼佛號，若一聲、若十聲，乃至百千聲，於念念中，在無數化無量壽佛，常護其人。又有二菩薩，一名觀世音，一名大勢至；是二菩薩，自為上首，俱諸大菩薩眾常來護。其人壽終之後，生彼無量壽清淨安樂國。

是故，阿難！設有猛火，充滿三千大千世界，必當過至，聞信彼佛名號，是人號火中生白蓮華，是名不可思議、名號利益、一大事因緣。

其佛本願力故，十方諸佛，皆俱讚譽，彼佛名號功德，又稱讚念佛有情之類；是故，汝等皆當信受彼佛名號。

世尊告阿難曰：如來所以興出於世間，說彼佛不可思議、真實功德、光明名號、利益大事因緣。是故，我說難值、難見、難得、難聞。

若有眾生，有聞此法者，皆應信順，如法修行。

世尊告阿難曰：彼法藏比丘，為度十方世界一切有情，雖起超世願，修無量大行，是本久遠實成，本有法身常住，無量壽佛以不可思議威神力故，遍滿十方世界，為教化安立無數有情，住於無上真實之道。或為剎利、國王、轉輪王；或為長者居家、尊姓豪貴；或為六欲、梵天王等；或為地獄、餓鬼、畜生、修羅身，常以四威儀，化作一切。

阿難！彼久遠實成，法身常住，無量壽佛者，豈異人耶？今日世尊我身是也，愍念汝等一切有情，無明大夜闇故，從彼安養無為界，示現此惡時惡世界

中，迦耶王舍等，說彼佛名號不可思議功德因緣，是謂難值、難見、難得、難聞。

是故，若有有情，聞此經者，皆應信受，如法修行。

世尊告阿難曰：縱令一切有情，煩惱惡業，深障重報，彼佛光明名號，神力無所障礙。是故，彼佛，號：無礙、無對、清淨、智慧、歡喜等。智慧無礙故，威神力亦無礙；神力無礙故，大慈悲亦無礙。

是故，濁惡世一切有情，若以有礙小智，有疑於佛無礙智、不可思議智、不可稱量智、大乘勝智、無等倫最上智，疑惑不信；以疑惑故，無數多劫中，墮曾婆羅獄，或入頻陀羅獄，受苦無窮，無有出期。

是故，若有有情，正信佛智者，即時入正定位，不退轉阿耨多羅三藐三菩提，是名不可思議、功德名號、利益大事因緣。

佛說此經，應時普大地，六種震動，天雨妙花，自然空中，有微妙大音聲，讚歎彼不可思議光、無量壽、清淨佛號，及今日世尊說大事利益因緣。

世尊說此經時，無量有情，發無上正真道意；諸天人民，得阿那含果；諸大菩薩，以四弘誓，莊嚴功德，於將來世，應成正覺。

佛說此經已，諸大菩薩眾，阿難等諸大聲聞弟子眾，聞佛所說，歡喜禮佛而去。